

Missingersuusiortarnermut inatsisip kukkunersiorneranut ingerlasumut atatillugu, takukkit ataani siunnersuummut tunngavilersuutit 1-miik 6-mut, matumuuna missingersuusiortarneq pillugu inatsisip kingusinnerpaamik UKA2013 allanngortinnissaanik saqqummiusseqqullugit Naalakkersuisut peqquneqarnissaannik Inatsisartut aalajangiiffigisassaattut siunnersuut
(Inatsisartunut ilaasortaq Andreas Uldum, Demokraatit)

Akissuteqaat

(Aningaasaqarnermut Naalakkersuisoq)

Siullermeerneqarnera

Siunnersuuteqartoq pitsaasumik missingersuusiortarnermut inatsiseqarnerup pisortat aningaasaataannik aqutsinnermut tunngaviusup pingaaruteqassusianik sammisaqarsimaneranut qutsavigaara. Naalakkersuisut taamatut aalajangiiffigisassatut siunnersuuteqarnermi siunertarineqartunut tunngaviatigut isumaqataapput.

Aningaasartuutissanik amerlanerpaaffiliisarneq pingaarnersaalluni nutaaliaavoq Naalakkersuisut missingersuusiortarnermut inatsisip iluarsaateqqinneqarnerani siunnersuutigilersaagaat. Tassa imaappoq ukiuni ataasiakkaani tamani aningaasat qanoq amerlatigisut pisortat suliassaqarfiini atorsinnaanerigut eqqoqqissaartunik aningaasartalerneqartalissasut kissaatigaarput. Tamakku saniatigut oqaasertaliussat sinneruttut inatsisissatut siunnersuutip sularineqarneranut ilanngussuunneqassapput, soorluttaaq ukunut arlalinnut sanaartukkanut aningaasaliissutissanut aallartinneqareersunut inatsisitigut tunngavissat siunnersuuteqartup erseqqissaatigisaatut erseqqissisinneqassasut.

Paarlattuanik Naalakkersuisut isumaqarput inatsit tamakkerlugu ataasiakalaartumik iluarsanneqarpat erseqqinnerussasoq paasiuminernerullunilu. Naalakkersuisut sulissutigaat taamatut UKA 2013-imi taamatut pisoqarsinnaassasoq, taamaannissaali qulakkeersinnaanagu. Pingaartumik aningaasartuutissanik amerlanerpaaffissaliiniarluni sulineq piffissamik atuinartarpoq kommuninillu siumut sukumiisumik oqaloqateqartarnissaq pisariaqarluni. Taamaammat Naalakkersuisut isumaqarput sulinnermut piffissaq atugassaq killilerneqassanngitsoq.

Tamakku saniatigut Naalakkersuisut immikkoortut allassimasut tamaasa isumaqatiginngilaattaaq. Akissuteqaammut matumunnga ilanngussami Naalakkersuisut siunnersuuteqartup immikkoortuliussai 1-imiit 6-imut tamaasa ataasiakkaarlugit, taamatullu aningaasartuutissanik amerlanerpaaffissaliisarnermut siunnersuut, isummorsorfigaat.

Tamakku tunngavigalugit Naalakkersuisut ukuninnga allannguutissatut siunnersuuteqassapput:

Missingersuusiortarnermut inatsisip kukkunersiorneranut ingerlasumut atatillugu, takukkit ataani siunnersuummut tunngavilersuutit 1-miit 3-mut, matumuuna missingersuusiortarneq pillugu inatsisip allanngortinnissaanik saqqummiusseqqullugit Naalakkersuisut peqquneqarnissaannik Inatsisartut aalajangiiffigisassaattut siunnersuut.

- 1. Inatsimmi oqaatsit atorneqartut Namminersornerup eqqunneqarneranut tulluussartariaqarput**
- 2. Erseqqissarneqassaaq, sanaartugassat aallartinneqarsimasoq, sanaartugassap akia tamakkiisoq Inatsisartunit imaluunniit Aningaasaqarnermut Ataatsimiititaliamit akuerineqarsimalerpat**
- 3. Missingersuusiornermut malittarisassat killiffiat nukittorsartariaqarpoq, taamaasilluni Missingersuusiornermut inatsimmi allassimalersillugu, regulativini aalajangersakkanut tunngatillugu immikkut akuersissuteqartoqarsinnaanngitsoq**

Naalakkersuisut Aningaasaqarnermut Akileraartarnermullu Ataatsimiititaliap allannguutissat siunnersuummik suliarinninnissaa qilanaaraat.

